



# COMUNU DE SOLÈMINIS

Provìntzia de sa Sardìnnia de Bàsciu

Bia Crèsia 18, 09040 – Solèminis (SU – Sud Sardìnnia)  
Còdixi Fiscali (CF) 80005100922 - Partida Iva (PI) 01430300929

## REGOLAMENTU PO CUNTZEDI CUNTRIBUTUS IN AGIUDU A IS ATIVIDADIS SPORTIVAS

(Primu pàgina de su Giassu istituzionali de su Comunu >  
Aministratzioni > Documentus in s'Arretza > Statudu e regolamentus)

Aprovau cun Deliberatzioni de su Consillu Comunali nùmeru trinta de su binti de Argiolas Duamilla-e-dexi (C.C. n° 30, 20/07/2010)

### Articulu unu

#### (Art. 1)

#### Tentas

Su Comunu de Solèminis arreconoscit sa funtzioni sotziali de su sport a suta de su perfilu educadori e formadori, de s'umperu de su tempus liberu e, po su prus, comenti aina de importu a su cresci psicu-fìsicu de donniunu e de amelloramentu culturali e tzivili de sa sotziedadi, puru de preventzioni a is straviamentus e amparu de sa saluti a totu is tzitadinus. Po ndi arrennesci in custa tenta, favoressit totu is fainas chi ant a promovi e abalorai su sport e a ndi assigurai su spainamentu po mesu de sa cuntzessioni de finantziamentus pùbricus e de intradas de su bilàntziu pròpiu in agiudu a is assòtzius sportivus arreconnotus de su Coni e abonaus in s'atividadi sportiva spassiadora e assentaus in s'Albu Regionali de is Sotziedadis sportivas, istituui cunforma a s'articulu noi de sa Lei Regionali nùmeru dexeseti de su dexeseti de maju Milli-noixentus-norantanoi [L. R. 17/05/1999, n°17] (su no ddui èssiri iscritus a s'Albu serrat s'intrada a is cuntributus chi ndi bessint de sa L. R. 17/1999).

### Articulu duus

## **(Art. 2)**

### **Pranu annuali de is interventus**

Po is tentas chi ndi bessint de s'articulu unu (art. 1), su Consillu Comunali stabilessit dònna annu, in seu de aprovatzioni de su bilàntziu previsionali, su pranu annuali de is interventus scioberendi su totali de is intradas de ddui distinaì.

Totu is cuntributus spartzius de s'Aministratzioni funt a praximentu e no permitint su deretu a s'ghiri in is annus infatu.

## **Articulu tres**

### **(Art. 3)**

### **Cumpetènzias de sa Giunta Comunali**

Sa Giunta Comunali, cunforma a is inditus de programatzioni de su Consillu Comunali e aprovaus in seu de Bilàntziu de Previsioni, capatzi chi delìberit de cuntzedi is cuntributus a foras de s'ordinàriu a is assòtzius sportivus e a is scolas e promovit propositas in agiudu de sa pràtica sportiva, finas po mesu de su faimentu e/o finantziamentu de is iniziativaas a unas a unas.

Interventu perunu podit èssiri apariciu de sa Giunta Comunali in agiudu de sogetus e propositas chi, segundu s'istrutòria, funt arresurtaus foras de is tìtulus chi tocant a tenni, preguntaus o in abètia cun is normas regulamentaris. Sa Giunta, anca ndi bit s'abisòngiu, innantis de ditzidiri de ddas escludi, podit preguntai a su serbitziu cumpetenti unus cantu scedatzamentus e averiguamentus in prus.

## **Articulu cuàturu**

### **(Art. 4)**

### **Comissioni Comunali po su sport**

Est istituia, cunforma a s'articulu cinqu de sa Lei Regionali nùmeru dexeseti de su dexeseti de maju Milli-noixentus-norantanoi (L. R. 17/05/1999, n°17, art. 5) sa Comissioni Comunali po su sport.

De sa Comissioni ndi est meri su Sìndigu o unu delegau suu chi s'at a fainai po ndi aprontai su cumandu de sa dii e sa cunvocatzioni.

De sa Comissioni pigant parti:

- a) s'Assessori Cumpetenti. Capitendi chi is funtzionis de Assessori de su sport siat su Sìndigu a ddas fai (finas *ad interim*), amanchendi issu etotu o sendi strobau, s'arremangat a nomenai unu delegau scioberau intra is Assessoris o Consilleris comunalis;

- b)** nùmeru 1 (n° 1) Consilleri nomenau de sa majoria;
- c)** nùmeru 1 (n° 1) Consilleri nomenau de is chi funt de s'opozizioni;
- d)** nùmeru 3 (n° 3) arrapresentantis de is faidoris de setori scioberaus de sa Giunta Comunali intra una lista nomenada de is Sotziedadis sportivas chi traballant in su Comunu. Custus arrapresentantis comentisiat ant a debi èssiri espressadura de sotziedadis sportivas chi faint sport diferentis e de calincuna importàntzia.

Pigat parti a is atòbius de sa Comissioni unu dipendenti de su Comunu cun funtzionis de agiudu tènnicu e segretàriu annotadori.

Is sètzidas de sa Comissioni funt bàlidas chi ddui aproillat assumancu sa majoria de is chi ndi faint parti. Is ditzisionis de sa Comissioni ddas a pigant a majoria de is chi funt presentis, sincasu de paridadi bincit su votu de su Presidenti.

Sa nòmena de sa Comissioni dda faint àinturu de tres mesis de candu su Sìndigu si-nci sètzidi e dda faint a nou dònna borta chi su Consillu Comunali si ddui at a torrai a sètzi. Abarrendi in is trèminis de sa primu nòmena, dda faint àinturu de tres mesis de s'adotzioni de su regolamentu presenti.

Is cumponentis de sa Comissioni funt decraus decadèssius po dimissionis o candu amancant, fora scusa peruna, tres bortas una infatu de s'àtera. Àinturu de unu mesi, àterus cumponentis nomenaus a sa matessi manera chi ndi benit de su custu artìculu etotu pigant su postu de is cumponentis decadèssius.

## **Artìculu cincu**

### **(Art. 5)**

#### **Su chi ddi spetat a fai a sa Comissioni Comunali po su sport**

Sa Comissioni Comunali po su sport espressat, candu aprovant su bilàntziu de previsionis, parrimentu preventivu in trèmini de is àutus de programatzioni comunali de is interventus in su setori sportivu innui su Comunu si-ndi aballit de finantzimantus pùbricus o distinit intradas de su bilàntziu suu e aingìriu de dònna àtera cosa de interessu de su logu in arrelatu a sa chistioni sportiva.

Sa Comissioni s'atòbiat, po òbrigu, àinturu de su mesi de capudanni po espressai unu parrimentu aingìriu de su programa de imperu de is imprantus sportivus e sincasu de spartzidura de su cuntributu.

Su serbìtziu cumpetenti atendit a sa formatzioni e a su tenimentu de s'Albu Comunali de is sotziedadis sportivas.

## **Artìculu ses**

### **(Art. 6)**

#### **Albu Comunali de is sotziedadis e assòtzius sportivus**

Po sa tenta de biri comentis funt is sotziedadis e is assòtzius sportivus de arratza spassiadora chi traballant in su logu comunali, est istituui, cunforma a s'articulu dexi de sa Lei Regionali nùmeru dexeseti de su dexeseti de maju Milli-noixentus-norantanoi (L. R. n°17, 17/05/1999, art. 10), s'Albu Comunali de is sotziedadis e assòtzius sportivus, chi sa formatzioni insoru est intregada a su serbìtziu cumpetenti.

In s'Albu ddui funt càpius, po dònna assòtziu chi tenit sa seu e traballat in su logu comunali, totu is elementus chi serbint a ddu arreconosci e crassificai.

Is sotziedadi chi no funt nàscias de diora depint mandai is preguntas po is iscrizioni a su Ufìtziu Comunali cumpetenti.

Is sotziedadis o assòtzius giai iscritus depint fai sciri in tempus, capitendi chi ddui siant cambiamentus aingìriu de sa seu sotziali, su statudu e s'arrepresentàntzia legali, a pustis de s'iscrizioni a sa lista.

Po anca si podit iscriri tocat a presentai:

1. còpia de su statudu e de s'àutu a bisura de àutu pùbricu e de scriidura privada cumbalidada o assentada, stèrria cunforma a su Decretu Legislativu de su cuàturu de Idas Milli-noixentus-norantaseti, nùmeru cuaturcentu-sessanta (D. Lgs. 4/12/1997, n° 460);
2. tzertificau de assotziadura;
3. arralamentu pibincosu aingìriu de is fainas de s'annu passau o de su chi tenint idea de fai.

Cun d-unu apòsitu provedimentu de su Responsàbili de su serbìtziu s'at a pigai àutu de sa lista de is sotziedadis e assòtzius arremonaus.

### **Artìculu seti**

#### **(Art. 7)**

#### **Is chi ant a gosai de is cuntributus**

Podint gosai de is cuntributus in agiudu de s'atividadi sportiva is sotziedadis e assòtzius sportivus chi tenint is tìtulus afatantis:

1. depint tenni seu legali e traballai in su logu comunali;
2. siant assentaus in s'Albu Comunali de is Sotziedadis sportivas;
3. siant assotziaus a is Federatzionis sportivas de su Coni o a is Entis de promotzioni sportiva arreconnotus de custu etotu;

4. fetzant atividadi sportiva de caràteri spassiadori, est a nai amanchendi su sbèliu de nci guadangiai, scriendiddu a craru in s'arrexoni sotzialis e puru in sa chistioni de su statudu o àutu fundadori;
5. fetzant arregulari atividadi sportiva totu s'annu, partetzipendi a campionaus o a manifestatzionis ufizialis apariciadas de is Federatzionis e/o de is Entis de promotzioni sportiva.

### **Articulu otu**

#### **(Art. 8)**

#### **Caràteris de is cuntributus**

Sa cuntzessioni de is cuntributus est acapiada a su fai de is atividadis sportivas o iniziativas chi ddi ant assenniadas e podint tenni caràteri:

1. **ordinàriu** in agiudu de su chi acostumat a èssiri s'atividadi sportiva annuali po su chi est stètia fundada sa sotziedadi etotu;
2. **a foras de s' ordinàriu:**
  - po s'apariciamentu o sa partetzipatzioni de is sotziedadis a manifestatzionis sportivas de livellu tènnicu mannu e spantosu chi tengant una promotzioni de importu de s'atividadi sportiva;
  - po manifestatzionis de interessu sportivu a profetu de sa promotzioni turistica de su logu.

### **Articulu noi**

#### **(Art. 9)**

#### **Cuntributus ordinàrius**

Su costu de su cuntributu depi èssiri fissau, po dònna sotziedadi, in arrelatu a is arrègulas afatantis:

- una cuota de su binti po centu (20%) de s'interu totali intregada in partis egualis a totu is sotziedadis chi ndi faint pregunta e chi ndi tenint is tìtulus;
- una cuota de su binti po centu (20%) in s'interu totali dd'ant a spartziri basendi-sì a pitzus de su nùmeru de partetzipatzioni a garas o manifestatzionis apariciadas, promovias o arreconnotas de is difarentis Federatzionis o Entis de promotzioni sportiva;
- una cuota de su dexi po centu (10%) po insullai is giòvunus a fai sport, chi sa Giunta Comunali stabilessit dònna annu, in dònna sotziedadi po dònna piciocheddu prus piticu de dexeotu annus tesserau cun sa tenta de s'atividadi sportiva spassiadora. Custa cuota etotu dda intregant sceti a is sotziedadis sportivas chi pregontant a is atletas piticheddus

una cuntribuzioni no prus manna de su tanti prus artu chi sa Giunta Comunali fissat dònna annu;

- sa cuota chi ndi abarrat distinada, in is trèminis de sa disponibilitadi de is finanziamentus, a ndi torrai su dinai de is spesas sustènnias po si-nci assotziai e s'assentai a is campionaus, tassas de garas, puru po sa cartillinadura de is atletus, is tènnicus e dirigidoris chi pigant parti a campionaus o manifestatzionis apariciadas, promòvias o arreconnotas de is difarentis Federatzionis o Entis de promotzioni sportiva. Po ndi torrai su dinai, s'at a arreconosci s'iscritzioni a una sceti Federatzioni o Enti de promotzioni.
- Is preguntas de cuntributu, stèrrias in d-unu apòsitu mòdulu giai prontu de su Comune e acumpangiadas de is paperis netzessàrius a s'averiguamentu de is tìtulus preguntaus, ant a depi lompi a s'Ufitziu Prisia (= Protocolu) a pustis de Pùbricu Bandu.

### **Artìculu dexi**

**(Art. 10)**

#### **Cuntributus a foras de s'ordinàriu**

Is cuntributus a foras de s'ordinàriu funt cuntzèdius, cun deliberatzioni de sa Giunta Comunali, po is tentas chi ndi benint de s'artìculu otu (art. 8).

Is preguntas de cuntzessioni de is cuntributus a foras de s'ordinàriu depint lompi a sa Prisia (= Protocolu) de s'Enti, acumpangiadas de unu arralamentu amostadori de s'iniziativa e de unu preventivu finanziàriu de anca ndi bessint is spesas chi su preguntadori pentzat de sustenni e is intradas chi si ponit in conca de fai fronti.

Sa bessida de is cuntributus est disposta a segus de presentazioni de càlculu de is spesas sustènnias.

### **Artìculu ùndixi**

**(Art. 11)**

#### **Liquidatzioni cuntributus**

Is cuntributus ordinàrius ant a èssiri licuidaus a is maneras chi sighint:

- unu acontu paris a su setantacincu po centu (75%);
- unu schìtiu de su binticincu po centu (25%) a segus de nci presentai su càlculu de is spesas a s'acabu de esertzìtziu.

Is cuntributus a foras de s'ordinàriu ant a èssiri licuidaus a is maneras chi sighint:

- unu acontu paris a su cincuenta po centu (50%);

- unu unu schìtiu de su cinquanta po centu (50%) a segus de nci presentai su càculu a s'acabu de manifestatzioni.

**Artìculu doxi**  
**(Art. 12)**  
**Intrada in fortza**

Su presenti regolamentu intrat in fortza a pustis de èssiri fàidora sa deliberatzioni de aprovatzioni de parti de su Consillu Comunali.